



Broj: 01/6-50-1-32-15/05

Sarajevo, 20.4.2005.

Z A P I S N I K
15. sjednice Komisije za saobraćaj i komunikacije,
održane 20.4.2005. godine

Sjednica je održana 20.4. 2005. godine s početkom u 11,00 sati.

Sjednici su prisustvovali članovi Komisije:

1. Miloš Jovanović,
2. Selim Bešliagić,
3. Izet Hadžić,
4. Adem Huskić,
5. Ivo Lozančić,
6. Nenad Mišić,
7. Muhamed Moranjkić,
8. Ruža Sopta i
9. Milorad Živković.

U ime Vijeća ministara BiH sjednici su bili prisutni: Nikola Šego, Mirko Šekara, Mehmed Dujso i Vojo Koprivica. Kao predlagači amandmana sjednici su bili prisutni: poslanik Vinko Zorić, poslanik Mirsad Ćeman i Vitomir Tošić (u ime poslanika Momčila Novakovića). Sjednicu su pratili i: Vedad Ramljak - OHR, Amel Zekić – Biro zelene karte BiH, Ševal Kovačević – Institut za sigurnosne studije i kriminalistiku Sarajevo i Edin Isanović - Istraživački centar PSBiH. Sjednici je prisustvovao sekretar Komisije Vedran Hadžović.

Predsjedavajući Miloš Jovanović predložio je sljedeći

D N E V N I R E D

1. Verifikacija Zapisnika 14. sjednice, održane 31.3. 2005. godine,
2. Prijedlog zakona o osnovama sigurnosti saobraćaja na putevima u Bosni i Hercegovini, predlagač Vijeće ministara BiH,
3. Ostala pitanja.

Dnevni red jednoglasno je prihvaćen.

Ad. 1. Verifikacija Zapisnika 14. sjednice, održane 31. 3. 2005. godine

Uz prihvaćenu primjedbu Ruže Sopte da se u navedenoj diskusiji Ruže Sopte i Filipa Andrića o Prijedlogu zakona o Javnom radiotelevizijskom sistemu Bosne i Hercegovine riječi:»najkasnije do 30. 6. 2006.» zamijene riječima:»u određenom vremenskom roku», Komisija je jednoglasno verificirala Zapisnik 13. sjednice, održane 31. 3. 2005. godine.

Ad. 2. Prijedlog zakona o osnovama sigurnosti saobraćaja na putevima u Bosni i Hercegovini, predlagač Vijeće ministara BiH

Predsjedavajući je istaknuo da su na predloženi zakon amandmane uložili: poslanici Adem Huskić i Selim Bešliagić, Mirsad Ćeman, Momčilo Novaković i Vinko Zorić, ta da je, u skladu sa Zaključkom sa 12. sjednice Komisije, Ministarstvo saobraćaja i komunikacija dostavilo

Osvrt na Javnu raspravu u vidu amandmana. Na osnovu podnesenih i pripremljenih amandmana, sekretar Komisije izradio je pregled koji sadržava ukupno 154 amandmana na Prijedlog zakona.

Nakon toga, predsjedavajući je otvorio opću raspravu o principima Prijedloga zakona.

U raspravi su učestvovali svi prisutni članovi Komisije, predstavnici predlagača Zakona i ostali prisutni sjednici.

Opća ocjena svih članova Komisije je da se radi o izuzetno značajnom zakonu koji je neophodno donijeti i koji treba u osnovi da uredi ovu oblast, te stvori sve predušlove za povećanje sigurnosti saobraćaja na putevima i smanjenje broja saobraćajnih nesreća. Zakonom je potrebno povećati odgovornost svih učesnika u saobraćaju, posebno vozača, državnih i nižih organa vlasti koji su dužni provoditi i nadzirati provođenje ovog zakona, kao i preduzeća za izgradnju i održavanje puteva, postavljanje saobraćajnih znakova, izdavanje certifikata za ispravnost vozila, firmi za obuku vozača, komisija za vozačke ispite i drugih neposredno i posredno uključenih u oblast sigurnosti saobraćaja na putevima. Neupitna je potreba da se Zakonom predvidi centralni registar vozila i vozača, kao i u drugim evropskim zemljama. Kaznena politika također treba biti preciznija i jasnija, te i odgovornost ne treba da bude samo na vozačima, već i na drugim subjektima u saobraćaju od kojih zavisi sigurnost saobraćaja na putevima. Time bi se građani zaštitili od neodgovorne državne administracije. Također, broj i sadržaj podzakonskih akata treba svesti na najmanju mjeru, a zakonom treba precizirati što više značajnih pitanja i time smanjiti obim i sadržaj podzakonskih akata.

Na osnovu ovih i niza drugih primjedbi na Prijedlog zakona o osnovama sigurnosti saobraćaja na putevima u Bosni i Hercegovini, predsjedavajući Miloš Jovanović predložio je Zaključak:

1. Od Kolegija Predstavničkog doma zatražiti da se rok za razmatranje Zakona u Komisiji produži za 30 dana;
2. Da komisija osnuje radnu grupu koja će u roku od 10 dana razmotriti primjedbe iznesene u raspravi, u sastavu: Izet Hadžić, Milorad Živković i Ivo Lozančić. U radu radne grupe će, osim članova Komisije, učestvovati i predstavnici Ministarstva saobraćaja i komunikacija, eksperti iz ove oblasti i sekretar Komisije.

Komisija je jednoglasno usvojila predloženi zaključak.

Ad. 3. Ostala pitanja

Članovi Komisije upoznati su s dostavljenim podacima Ministarstva za saobraćaj i komunikacije o raspodjeli CEMT dozvola, o čemu će Komisija raspravljati na jednoj od narednih sjednica.

O terminu naredne sjednice članovi Komisije dogovorit će se naknadno, s tim da je okvirni termin 10. maj 2005.

Kako nije bilo drugih prijedloga za ovu tačku dnevnog reda, predsjedavajući je u 14,30 sati zaključio sjednicu.

SEKRETAR KOMISIJE
Vedran Hadžović

PREDSJEDAVAJUĆI KOMISIJE
Miloš Jovanović